



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 3



Jamshedpur FC-i Halder den tenangzüktepba yanglushi

UP nung sorkari süngdong crore 36 atemtsü: Yogi Adityanath



VOL. XXI ISSUE NO. 278 (ADOK 278) DIMAPUR AMUNGNÜ (SUNDAY) CHITENI (JULY) 21, 2024 ₹ 5.00

ANCSU-i kaketshir nungdaktem lemsateper

Dimapur, July 20, 2024 (TYO): All Nagaland College Students' Union (ANCSU)-i Nagaland Chief Secretary dangi shidi ka züluba nung kaketshirtem dak sendakba onük aika lemsatepogo. ANCSU-i scholarship, coaching institutes aser college transportation atema tongti süa shidi zülü. Parnokisa state sorkar dang tekaratiba nung item onük asoshi mapa inyaktü ayongzükogo kechiyong mapa meinyakra kaketshirtemi lungkak aitsü akok ta metetdaksüogo.

Sorkari October 25, 2019 nü Scholarship Nodal Cell lapoktsü nangzük saka tanü tashi ibaji mapa küma meinyak lir anungji state sorkari tekaratiba nung nangzuka aliba ama iba mapa inyaktü ayongzükoger ta ANCSU-i ashi.

Nagaland nung Coaching Institutes lapokba ajanga kaketshirtemi teyari aika ngua arur. Iba ama rejutem ya shisaliok rejutem den kasa anungji

educational regulation/authority kar kübok dendaktsütsüla ta ANCSU-isa ashi.

Nagaland nung sorkar college tem nung kaketshirtem transportation khurettem lir. Sorkari Sao Chang College Tuensang, New Model College Mangkolemba, Zunheboto Govt. College, New Model College Wakching aser Peren Govt. College nem college bus agütsüba atema pelar saka ano maneni transportation facility nungdaker.

Dimapur Govt. College nung kaketshir 1800 tema lir aser kaketshir aika anepdang shia Niuland aser Chumukedima district tem nungi arur. Dimapur Govt. College nung college bus (32-25 seats) ana lir saka kabo raksar lir. Anungji sorkari kaketshir yongsük repranger bus garitem nungdakba ama agütsütsü mepishir ta ANCSU-isa metetdaksüogo.

Dimapur Police-i mopung menenba aziüoktsü meranger

Dimapur, July 20, 2024 (TYO): Commissionerate Police Dimapur-i National Clean Air Programme (NCAP) kübok Action Plan air pollution tenzükogo.

Financial Year-2023-24 atema Dimapur nung mopung menenba noktangtsü atema Dimapur police-i iba mapa tenzük.

NCAP plan nung aliba ama vehicular emissions aziüoktsü atema Dimapur Police-i Pollution under Control Certificate (PUCC) repranger aser English o Nagamese nung "Together for Clean Air" Pamphlets lemogo.

Police-isa Dimapur aser

temeket nung aliba traffic islands nung NCAP Hoarding Display Boards yua lir aser jana rongdokba tesemtem nung 'Do Not Burn Waste' display boards yutsüogo.

Alima nung mopung menenba 70% ji gari mokozü ajanga lir aser iba agi Dimapur Police-i iba nung temulung kanga agütsür. Linük den külemi Commissionerate Police, Dimapur lenisüba kübok iba mapa tenzük anungji Dimapur nung alir ajaki yariteptsü ayongzükoger ta Commissioner of Police Dimapur-i sangdong ka nung ashi.

Bangladesh nungi kaketshir 1000 aruogo

New Delhi, July 20, 2024 (Agencies): Bangladesh nungi India nung kaketshir 1000 shi land ports aser regular flights ajanga India-i aruogo.

Bangladesh nung kaketshirtemi lungkak aitiba sülen Ministry of External Affairs (MEA)-i ketdangpur balala den amalitepa India nung anir arur.

Kaketshir 778 tashi land ports ajanga aru aser kaketshir 200 shi kati Dhaka aser Chittagong airport nungi tayimtsü ajanga aru.

Bangladesh nung tang tashi nung nisung 115 asüba osang angazük.

Dhaka nung Indian High Commission den Chittagong, Rajshahi, Sylhet o Khulna nung Assistant High Commissions

ajanga India nung anir aruba nung yaritepa arur. Külen MEA-ia India-Bangladesh arrtsü ajanga anir arutsü atema local ketdangsurtem den osang agitepa yariteper.

Dhaka nung asen High Commission aser Assistant High Commissions ajanga Bangladeshi university balala nung azünger kaketshir 4000 tema den osang agitepdar aser akokba tashi yaritepa arudar. Nepal aser Bhutan kaketshirtemia teyari meshiba ajanga onoki yariogo" ta MEA-i metetdaksü.

Dhaka nung Indian High Commission-isa Bangladesh civil aviation and airlines den amalitepa Dhaka aser Chittagong nungi anogoshia India-i tayimtsütem arutsü atema mapa inyakdar.

Shisaliok ya kija takok atema dang masü saka lokti ajungtsü atema lir



Nagaland Governor La Ganesan-i Oriental College Kohima mezüngbuba Graduation Day nung adendang agiba noksa ka angur.

Kohima, July 20, 2024 (TYO): Shisaliok ya kija dang takok angutsü atema dang masü saka loktiliba tajungba akümtsü hadir ka lir ta Nagaland Governor La Ganesan-i ashi.

Honibarnü Oriental College Kohima nung mezüngbuba Graduation Day amongdang Ganesan-i graduates 91 dang iba ya ashi.

"Nenok tanü nungi mera tasen agia aodang, shisaliok ya nija takok angutsü atema dang masü saka loktiliba tajungba akümtsü asoshi lir. Nenoki akangakanga noktakba, ochishiba aser aria bilemba ajanga nenok taküm aser wadang jangjatsütsü" ta pai ashi.

Alima nung khuret aser tayongzükbatem ajurur anungji asenok tangatetba nung

akangakanga noktaksüla aser ochishir asütsüla ta Ganesan-i ashi.

Meranga inyakba aser tajung akümtsü merangbaji kanga tongtipang saka iba den külemi külem sensotem asoshi aria bilemetsüba aser linük meimba tangatetba alitsüla ta paisa metetdaksü.

"Nenoki inyakba mapa ajanga tangar dak kongshitsü anungji tanü graduate asürtemi lokti aser linük asoshi shilem tajung agitsü ayongzük. Graduation Day ya kanga dang tongtipang lir kechiyong iba ajanga kaketshir ka tapak tembanger saka ano wadang tasen ka tenzük" ta La Ganesan-isa metetdaksü.

Nenoki linük asoshi inyakbaji nenok maparen ajanga sayutsü. Ibaji ajanga 2047 nung India ya

developed country ka akümtsü ta paisa ashi.

Christian Revival Church, Kohima village kübok 1996 küm Oriental College lapokba sülen shisaliok aser sobaliba centre ka akümba atema Governor Ganesan-i tenüngsang agütsü.

Iba sentong nung mendenji Vice Principal (Administration) Chibeni Murry Iasü, CRC Kohima Village Associate Pastor Vizotuonyü Dzüvichü-i temoatsü meshia sarasadem aser Principal Dr Khrieriezhünuo Dzüvichü-i tesentepertem pelaa agizük.

Sentong nungsa Dean Students' Welfare Chubanenla Imchen-i anküp tepela o jemi aser Hpong & Senti o Assistant Prof Dzüzienuo nungeri ken ajanga shilem agia liasü.

Sakra World Hospital indang Associate office ka lapok



Dimapur, July 20, 2024 (TYO): Bengaluru nung nungtugu multi speciality hospital Sakra World Hospital indang Associate office ka Chumoükedima nung lapokogo.

Heaven Delight building, Chumoukedima nung aliba Dentique den yaritepa Associate office lapoker.

"Onoki sen dalangba agi temang tajungtiba nung anepalutsü tenangzükba lir. Nagaland nung healthcare infrastructure tajungba

kümdaktsütsü asoshi onok indang mezüngbuba meraji healthcare tajungtiba agütsütsüba lir" ta Sakra World Hospital, Group Chief Operating Officer, Lovekesh Phasu-i ashi.

Kobi melii Nagaland nung outreach OPD, video consultations aser second opinion clinics lapoktsü aser shirangertem yaritsü atema senior doctors arutsü ta Phasu-i ashi.

"Iba tesentaktep ajanga Nagaland nung alirtem kanga ajangzüktsü. Nübertemi

affordable quality treatment angutsü" ta MD, Dentique Dr. Imnasenla Longkumer-i ashi.

Onok indang nükjidongji nisung shia atema international standards nung healthcare bener arutsüba lir, ta Dr. Imnasenla-isa ashi.

Sakra World Hospital ya India nung mezüngbuba multinational corporation aser 100% foreign direct investment hospital lir. Iba hospital ya Japanese company SECOM aser Toyota Tsusho Corporation ajanga lapok.

Minister Temjen-i PHC Mangolemba Sub-Division atema Ambulance ana tenzüksü



Temjen Imna Along-i Primary Health Centre atema Ambulance ana tenzüksüba noksa nung angur.

Dimapur, Chiteni/July 20 (TYO): Ministry of Tribal Affairs-i senotsü teyari agüja Tribal Affairs Department, Nagaland-i, Primary Health Centre (PHC) Mangolemba Sub-Division atema Ambulance ana tenzüksüba sentong July 19 nü Directorate of Tribal Affairs nung agiogo.

Minister for Tourism & Higher Education, Temjen Imna Along, shibai iba ambulance ana tenzükja liasü, pai Mangolemba Sub-Division kübok Japukong range Primary Health Centre (PHC) aser Tsurangkong range atema Ambulance ana alizükba ya takok tulu ka aser temaotsü lir ta shia tzükong ana nungi ketdangsur aser lenirtem dang good governance dak sendakba nung nüburtem nem tangazükba agütsütsü ayongzüka liasü.

Sentong nung o jembiba mapang minister-i, Japukong aser Tsurangkong kong yimtsüng 35 dak tema lir, iba den kidanger yimtsüngtem aser item tesemtem nung aliba

aayangertem iba life-support ambulances ajanga ajanzüksü imlaba lemsatep aser ashiba agi, Nagaland nung PHC noklang dak tema lir, anungji state-i health care jenjang temabai ajungketsü atema merangtsüla, kechiyong nüburtem temang anepalutsü atema tanga district-i oa senotsü aika intoker.

Paisa, life-support ambulance koba Kohima aser Dimapur nung dang lir, iba ya tangbo yimdak yimtsüngtem tonga yokogo ta shia iba ya Health & Family Welfare department atema takok ka lir ta ashi. Pai, ambulance ya lokti aser Department of Health and Family Welfare na longjemba temaitsü ka asütsü aser iba life-support ambulances anepalutsü atema PHC aser nüburtemi khuret lemsatepa abentsüla, ta ashi.

Minister Imna Along-i ashiba agi, PHC ana nem teyari agütsütsü atema technician tem shimtsü aser LADP fund ajanga gari anir nem itasen agütsütsü, kechiyong iba amala

fund iba amala nungdak atema amshiba ya tejakleni aotsü asoshi tapet lir.

Kasa mapang nung sentong nung o tatsüka jembiba mapang Principal Director, Health & Family Welfare, E. Motsuthung Patton-i, life-support ambulance ana agütsüba atema Department of Tribal Affairs dang kanga pelaba aser iba ajanga iba tesem nung aliba nüburtem ajanzüksü imlaba lemsatepa liasü. Paisa, infrastructure terenlok aser sub-centre tasen yangluba mapang teyari agütsüba atema Department of Tribal Affairs dang kanga pelaba shisem.

Maneni sentong nung Tsurangkong tzükong tir Moanuksung Japukong tzükong tir Imdongtangba natia o tatsütsü jembia liasü. Project Officer Tribal Affairs, Imsumeren shiba lenisüba nung iba sentong agia liasü, pai technical report agütsü aser life-support ambulance ana indang metetdakja liasü.

Dimapur nung tasü mang ka nguteta lir

Dimapur, Chiteni/July 20 (TYO): July 19 nü 10:30 ako shi nung non-local tebur ka Railway Bazaar, Dimapur nung sür aliba osang Sub-Urban Police Station, Dimapur-i agizüka liasü.

Osang anguba sülen duty party iba tesemi ao aser mejangjaba tebur tasü mang ka nguteta liasü. Asüsang ta arishi küm 45 shi asütsü ta bilemer.

Tasü mang dak sendakba nung ken o asüngdangyaba sülen temulung malemtsüsa ken o kecha sendaka mali ta ngutetogo.

Temzüng özüng kübok tinyaktsü maparen ajak tembanga inyakba sülen tasü mang ya PM examination/identification atema District Hospital Dimapur Morgue-i benerogo.

Asüsang yagi tola green ka aser blue & white checked half pant ka semer liasü.

Ken o dak sendakba nung kinunger aser medemertem dang Officer-in-Charge, Sub-Urban Police Station, Dimapur (Mobile No. 7085055026) den tongteprateptsü asoshi mepeshia metetdaksüogo.

NPCC-i tenüngsang agütsü

Dimapur, Chiteni/July 20 (TYO): NPCC Working President Khriedi Theunuo aser NPCC Vice President Capt GK Zhimomi na North East Congress Coordination Committee General Secretary ama shimba atema PCC tir den Nagaland Pradesh Congress Committee kübok mapa balala nung tenzükertemi ajaki tena nem tenüngsang agütsüba sangdong ka ajanga metetdaksüogo.

Küm aika masetshi-i Indian National Congress atema bendanga agüja meranga inyakba kuli tang tena iba mapa atema shimogo, koba tenati kanga langa lir.

Onoki tena wada tasen takok nung inyakyonga aotsü imlaja atar aser tarutsü nunga iba amai jenjang tajung nguteta aotsü yongyaseta atar, ta NPCC Communications Department sangdong ka ajanga metetdaksü.

Yingli College nung awareness campaign ka ayongzüka agi

Dimapur, Chiteni/July 20 (TYO): 'Career Prospects in SBI' dak sendakba nung July 19 nü Bank Nationalisation Day amungba mapang Yingli College, Longleng nung awareness campaign ka ayongzüka agiogo.


Iba sentong ya State Bank of India, Regional Business Office, Mokokchung aser Career Guidance & Counselling Cell, Yingli College na longjemmer ayongzüka agia liasü. Sentong nung Branch Manager, SBI Longleng, L. Peter Longchar-i okila jembia liasü.

Deputy Manager, RBO,

Mokokchung, AIBOC State Secretary & C.C.M. SBIOA, NE Circle, aser shisalen sayur, Imtisanen Ao nungeri banking sector nung maongka balala aliba aser nükla tajung indang tangazükba agüja liasü.

Kasa mapang nung Asst. Manager, SBI Mokokchung, Viliezoto Neikha-i, SBI dak sendakba tatidang balala ajangtetsü atema tasa balala indang tangazükba agütsü. Sentong ya shisalen sayur-i, banking sector nung local tem nungdakba indang lemsatepa sülen tembanga liasü.

Küm 12 sülen Abiogenesis pur kensep tasen ka sayaogo



Dimapur, Chiteni/July 20 (TYO): Nagaland nungi mezüngbuba Naga Folk fusion band Abiogenesis' puri, 'Tales In Harmony' ta nungja agütsür July 20 nü kensep tasen ka sayaogo.

Iba kensep ya Gurgaon nung

amendaker aliba Songdew Music Label ajanga saya aser Spotify, Apple Music, Amazon Music, Deezer ama International major digital platforms ajak nung stream asütsü aser alitsü angutsü. Parnoki tesüsa 2012 küm

'Legacy of the Mountains' kensep saya liasü.

Kensep tsenba ya-a parnok indang Naga Howeymusic genre nung adokogo, koba Naga nunger sobaliba kensü aser tanga kensü balala temeyoktep ka lir. Kensep nung ken tenet lir, kong Naga folk fusion ken trok aser India kensü nung ken ka lir.

Mezüngbuba ken 'Chathe Breeze' ya reggae ken ka lir, koba Dimapur temeket nung lemluwa mapang ayong nungi mopung tanep asenba indang lir. Tanabuba ken ya 'Asen Lima' (Our Land) lir, koba Ao oshinung atenba ken ka aser ken ajanga Naga nungertem pei lima nung nütsünyongsüka ajema akümtsü ana nung aliba indang osang agütsü.

Ken tasembuba nungjaji 'Rajdhani Express' lir, koba Rajdhani Express train nem bendanga agüja tentsüba ken ka lir. Ken pezüba 'Drizzle' ya bamhum instrumental piece 5 Spell Peace ka lir aser iba

ajanga 3rd world war adoktsü aliba indang atener aser iba kentenba telok yagi iba ken ajanga alima nung yimjung atema ayongzüker.

Maneni ken pongububa nungjaji 'She's A Thief' lir, koba parnok indang Howey musical play "Putu and His Tiger Spirit" nungi ken ka lir. Iba saya ya Abiogenesis theatre group-i 2018 küm Gubbi, Karnataka nung saya-a liasü. Ken trobuba 'Merangti' ya instrumental piece ka lir.

Tatembangbuba ken ya vocals aser instrumentals temeyoktep ken ka lir, kong Bamhum leading instrument lir. Bamboo percussion 'Tikzik'-a ken timba nung atemba angashitsü.

Bamhum aser tikzik amshiba ajanga Abiogenesis pur kenten ola tangar dang nungi balaka küma melenshitsuogo.

Abiogenesis puri commercial mesüra pop (popular) music matener aser matemer, saka Naga nunger ken

asir kongki ajungketsü meranger asünung parnoki nüburtem dang parnok ken alizüka aser stream süa parnok yaritsü mepeshia metetdaksüogo. Parnok kentem ya youtube handle @abiogenesis88 nung angutsü.

1991 küm iba kentenba telok tentetba sülen nüburtemi temeim sayuba ajanga Abiogenesis pur küm 33 tashi mesamai arudar. Abiogenesis nung Vocals & lead bamhum Arenla Subong, drums & Tikzik Aso Kinavi Yim, Bass nung Kora Aier aser rhythm guitar, bamhum, tikzik & harmonica Moa Subong lir.

Parok kentem indang lintük: Spotify link:

https://open.spotify.com/album/6Kkbj2TOU3346adEujhNpC?si=MqW_VCB0QXK39ZBkfr4hag&nd=1&dlsi=4ee87b5188194c24
Common Link:-

<https://songwhip.com/abiogenesis/tales-in-harmony>

Melungnen O



L. TULU IMSONG
02.10.1930 – 21.06.2024

Ozü temeim tsürabur obala aser oboula **L. Tulunüangsang Imsong** taküm alidang aser pa arishia lir June 21, 2024 anogo nung iba lima nungi pilar onok mangyim jashi nung alidang pur medemer, kinunger-adianu aser temeimertem shimokisa onok dak malangba temeim shisatsü aser mapatem agi onok nungita amang agi sangwa kuma yariogo, nenok ajak dang onoki kanga pelaba mulungnen o ka yangi lemsateper.

Ozü tsürabur anaprongla onok den taküm alidang aser parnok den pilaba anogotem nunga onok tepela aser timtem anogotem ajak nung kija-kibong, kidang-kiyonger, yimten, lokti tentet aser arogotemi sarasadem, nebo, rongsen aser shisa tajung agi yaribayong, onok timtem aser tejashi agi tesünek kuma onok mulung anisungzükogo. Item temeim mapatem ajak onok mulung nung teti alitsü aser Tsüngremi nenok mapa tajung meyipa moajangma ta onoki sarasademtsür.

Tsüngrem tsübuba, meranga inyakba, taremsük aser kümli tajung tsürabur Kibubai teti tepeladak pelashishia agizüker alitsü imlar.

~ Kinungertem.

Kolkata nung US National Day among



Kolkata, July 20 (Agencies): Hokolbar nikongdang Kolkata nung U.S. Consulate General Kolkata-i America nunger nüchiso anguba sülen küm 248 ajungba aser Kolkata nung US nunger aliba sülen küm 230 ajungba nungtem nung U.S. National Day anogomong nung sentong ka ayongzuka kaogo.

Iba anogomong sentong nung jembidang U.S. Ambassador to India, Eric Garcetti-i, "Tarutsü nung rangloker asenoki tesendaktep maneni yangerba mapang nung United States aser India nati senteper inyaktetba

tulu-tila ajak aser alizung balala tongtetba atema asenoki benjungteper," ta metetdaksü. Consul General, Melinda Pavak-i, "1794 küm tziyimtem nungi tenzüker 2024 küm petinutem tashi asenoki mera tila-tulu balala agiba atema akhüm agütsür. Iba ya ajanga U.S-India tesendaktep ya alima nung democracy tajungba akümtsü mapatong ka kumogo," ta ashi.

Nikongdang ayongzuka agiba sentong nung tongti tejaokerji West Bengal Angh, B.P. Gopalika liasü.

UP nung sorkari süngdong crore 36 atemtsü: Yogi Adityanath

Lucknow, July 20 (Agencies): Honibarnü Uttar Pradesh chief minister, Yogi Adityanath-i, parnoki state tesem ajaklen süngdong crore 36 atemba ajanga otsü tasen ka yanglutsü, ta metetdaksü.

Süngdong atemba campaign tenzüksüdang pai, World Environment Day anogomong nung Ato kilonser Narendra Modi-i linük nübur ajak dang süngdong kaka atemtsü ayongzuka liasü, ta metetdaksü.

Yogi-isa, alima tatsükba akümba ajanga alima nung lendong tasen ka adoktsü ta environmentalist tem shisabulur; iba timtem ya meimchirtem merumeroba agi lir, anungji alima tatsükba akümba azüoktsüji meimchirtem teinyaktsü mapa lir, ta ashi.

"Uttar Pradesh nung nütsung crore 25 lir, anungji onoki süngdong crore 36.50 atemba ajanga 'record' tasen ka yanglutsü. Iba ama tensa ka nung anogo ka kija nung tetsütem ajak tenüng nung

süngdong asemsem atemtsü. Anepdang nungi tang tashi nung süngdong crore 12 temogo. Asenoki süngdong atemtsüla, süngdong wazuka ayutsüla aser alima wazuka ayutsüla," ta UP chief minister-isa metetdaksü.

"Tang mezüng asenoki tziümetsüng lendong tulu ajangshir. Tziümetsüng ajanga UP nung district 24 kübok nisung lakh 20 dak tema kongshiogo. Nepal aser Uttarakhand na nung tziunglu tali aruba agi tziümetsüng lendong ataloker. Iba ya alima tatsükba akümba agi lir. Taküm May-June yabo mapang talangka bilemtetsü," ta paisa ashi.

"Teti agia yangi temperature 42-45 dang alir saka takümübo temperature 47-50 tongogo. Iba ya ajanga tziü agia anüngtsü. Tesem kar nungbo mapang masüdang tziunglu arutsü aser tesem kar nungbo tsüngsarusa alitsü. Item temelenshi ajanga tesem aika nung ayawara arutsüa akok," ta paisa metetdaksü.

Haryana election atema AAP-i tenangzükba onük pongu metetdaksü



July 20, 2024 nü Haryana kübok Panchkula nung Kejriwal tenangzükba pongu sangdongba sentong nung Delhi Chief Minister kinüngtsü, Sunita Kejriwal, Punjab Chief Minister Bhagwant Mann na den Aam Aadmi Party (AAP) lenirtem- Sanjay Singh aser Sandeep Pathak nunger tangokba noksa nung angur.

New Delhi, July 20 (Agencies): Haryana assembly election atema Honibarnü Delhi Chief Minister Arvind Kejriwal kinüngtsü, Sunita Kejriwal-i "Kejriwal tenangzükbatem" pongu metetdaksü.

Taküm küm tatembanglen Haryana nung Assembly election agitsü.

AAP tongti lenir, Kejriwal-i Haryana nung alirtem dang nangzükba ponguji- kidang atsükba electricity angati, angati

medical treatment agütsüba den Mohalla clinics lapoktsütsü, angati shisaliok agütsütsü, Haryana nung tetsür shia nem ita shia sen meyirjang kaka (1,000) agütsütsü aser lanurtem nem mapa agütsütsü.

Delhi excise policy ken o dak sendakba nung Delhi chief minister, Kejriwal bo tang judicial ket nung lir.

Honibarnü Haryana kübok Panchkula nung Kejriwal indang tenangzükba pongu sangdongba sentong nungji Sunita Kejriwal

asur Punjab Chief Minister Bhagwant Mann na den Aam Aadmi Party (AAP) lenirtem- Sanjay Singh aser Sandeep Pathak nungera liasü.

Iba sentong nung jembidang Sanjay Singh-i nüburtem dang Haryana nung AAP sorkar arutsü atema yaridaktsüner, ta ashi.

Singh-isa, AAP-i nangzükba ama inyaker saka BJP-i bo yazü dang nangzük, ta ashi.

AAP-i Haryana nung assembly menden 90 prongla nung tokteptsü.

NEET-UG 2024 paper leak ken o nung asalentong yanglur tongti apu

New Delhi, July 20 (Agencies): Honibarnü Central Bureau of Investigation (CBI)-i NEET-UG 2024 paper leak ken o nung asalentong yanglur tongti ka den paper nung tangar melen langzüksür ana puogo, ta osang ka ajanga metetdaksü.

Iba ken o nung asalentong yanglur tongtiji B.Tech graduate ka lir aser tangar melen

langzüksür anaji MBBS student ana lir.

Anogo ka jakdang kasa ken o nung CBI-i Ranchi nung aliba Rajendra Institute of Medical Sciences (RIMS) nung first-year MBBS student, Surabhi Kumari pua liasü. Taküm May 5 nü NEET-UG exam agiba anogo nung auyaba exam paper nung langzüksüba nung shilem agiba dak sendakba nung

Kumari dang anogo ananü asüngdangyaba sülen la apu.

NEET-UG paper ji National Institute of Technology, Jamshedpur nungi 2017-batch civil engineer, Pankaj Kumar (Aditya)-i auyaa liasü. Pai Hazaribagh nung NTA trunk ka nungi paper ji auya.

Iba jakdang CBI-i AIIMS Patna nungia MBBS student pezü pua liasü.



July 20, 2024 nü New Delhi nung BJP MP ana- Ramvir Singh Bidhuri aser Bansuri Swaraj na den party lenir Arvinder Singh Lovely nungeri osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JULY(CHITENI) 21, 2024

Tsüngrem sentsüwangshidaktsüba

Asenok atema Tsüngrem nungi anguba osang tajung kaji, asenok timtem nung Pa dang ashiba agi asenoki Pa sentsüwangshidaktsür. Iba taochi o ji asenoki Tenüngsang Ken 50:15 nung, " timtemba mapang nung kü dang jaang, ni na kümzüksü aser nai ni sentsüwangshidaktsütsü," ta shia angur. Iba Laishiba tekong ya zünger külen tepela agi Tsüngrem tenüng mesangiang melitetter. Asenok timtem nung aiben asenoki Tsüngrem dang ashitsü mebiletetter, iba jagi asenoki talila Tsüngrem jashidaktsür aser Pa nungi teyari angutsü melen asenok akoksar aser samar. Asenoki amangba, Abraham, Isak aser Yakob Tsüngrem, shibai asenok menen alangzüksü atema Par ajaso chir Yisu Khrista nisung kümer alimai yok, iba Tsüngrem ya taochi agi moshia aliba Tsüngrem lir. Iba jagi Pai asenok Pa nungi pilar timtema medoktsüner. Ibayongji, asenoki Pa mebushidangyongi, pai asenok lenji-i talangkati arur. Pa bushira, Pai kümzüksü aser iba jagi Pa tenüng sentsüwangshidaktsütsü ta asenok nem metetdaksür. Atangji, kenkenbo Tsüngremi asenok meimba agi asenok nem Pa taochi angatetdaksütsü mechi timtem ajurudaksütsüa akok. Iba ama mapang nung asenoki Pa dang shira, Pa kanga pelar aser Pai asenok kümzükter. Asenok nüngdak Pa dang ashiba jagi, asenoki Paji kiburtem madak Kibur aser tsüngremtem madak Tsüngrem ta jangjatsür. Aji oda, asenoki Pa sentsüwangshitsür. Alima nung teti asenok peria dang lira mesüra asenok timmedemi dang lira, ashiko asenoki Tsüngrem amadoktsüa akok. Iba jagi nai nü taküm ya nüsasa lieteter ama bilema asükumadoktsü. Tsüngremi maginübaji ibaji lir. Anema lidaktsüba aser lendong nungi kümzükba ajakji Tsüngrem taochi ajanga lir ta Pai asenok nem angatetdaksüner. Aji oda, Tsüngremi asenok ya kanga meimer asünungji Pai asenok timtemi maidangyongi asenok kümzüksü renema lir. Ibaji angatetra, asenok shisabolutsü nüngdak madoker. Ibayongji tenyar Paul-i Filipi 4: 12 nung yamai ashir, " kechi koda ajemzuka alitsü aji ni metet, aser kechi koda jenti kaa alitsü ajia ni metet, kechisarina nung aser ajak nung, sünga alitsüa aser yaa alitsüa, jenti kaa alitsüa aser anünga alitsü, iba miim oji ni angazükogo." Iba miim ojj tanga masü saka Paulisa kasa Laishiba nungji ashir, " Khrista shibai ni tashi itdaksür Pa dak ni ajak inyaktsü akok." Iba o ya asenok timtem aser shisabolu mapang nung dang masü saka kaa-itta alidanga Tsüngrem bilemtettsüba o lir. Asenok aika timtem aser makamait agi tonger shisabolua alitsü akok, saka Laishibai ashir, Tsüngrem sentsüwangshidaktsütsü mapangji asenok timtemba mapangji lir. Iba ama mapang ka nung, Tsüngremi asenok nem Pa bushidaktsüner. Ibaji angateta asenoki Pa dang jara asenok nüngdak ajak ataloktsü. Timtemba mapang nung Tsüngrem dang teyari meshibaji asenok meshimetsür masü saka Tsüngrem sentsüwangshidaktsür ta Tsüngremi Pasasa ajemalua asenok dang ashiba o jagi asenok temulung kanga anisüngzüker. Asenok karbo pei temenen agi Tsüngrem tsüngdang akseta pei timtema meshiteti alitsüa akok, saka Tsüngremi ashir, asenoki asen timtem Pa dang ashiba jagi Pa tenüngsang tali sentsüwangshidaktsür. Iba dang nung jagi taochi tuluba asenoki kong angutsü !

OLEMSABANG

TIYAZÜ RONGSEN AGI TEMBARTEM KÜMDAKJANG


~ Süpongñüngsang Longkümer, Darogapathar Dimapur

Alima rongsen teka nung teti malir, tanü penür arutsü aser asüng indokmar alitsü ta asüba (Worldly wealth) alima rongsenji samaa aoba rongsen dang Tsüngrem ou agi tiyazü rongsen ta ajar aser kotak nung rizüngtettsüsa amangtetba purtem dang mesamaba ochi rongsen ta Tsüngrem ou Luk 16:1-10 nung angur. Iba Lai yagi Takarsanger kettangsuba jagi shidak inyak saka kar tenükmerem ama angatetter kechaser kibur dang rongsen mesama ta sayutsü asoshi aposhilur dang temeim sayuba ama aser iba ama nisung timtemra tembartem jagia meyipba yaritsü sayur. Iyongjiang kibur jagi kettangsersang tenüng asang. Aouyaba mapaji miima shinga nema mungudaktsüe pena aoba rongsen. Rakzükkraktemba tejak tepang nembanger kidangi odia oa rakzükba mesüra lenmang nung ataa mendanger tangar malitang rakter rakzükba rongsen. Ashekelak rongsen ajak dang tamajungba rongsen pelasetta tejak tesangwa khen agi tamajung majitetdaksü sangrasangjia bei metemer angutsü aliba ketlaka akiba rongsen. Election mapang sen amshiba yimya tapu asem pezü lir. Nisung karbo candidate-bai pa yaritsü ta metetta tang-a nai meyarira lenmang satema mali anungji sen ya amshia nüpu yima jajaang ta sür sen amoktsür, nisung karbo jashiba agi mayazüksü ta lia worker kar arur mepishia mepishia yaritsüsa akümer kechiba? Condidate-bai tesüba mapang parnok ten jembiba shidak meinyakba agi meyaritsü lemtetter alir nem sen amoktsür. Nisung kar sen magütsü tashi anema sayuraser sen agütsür kelenang hae haura akar saka yote pa nem meinokdaksür. Shirnok nem sen agüja yaridaktsüogo parnok asoshi mapa tatm, parnoki nüngdak asüngtanga mesüra mapa mishia aru nunga tiyari Pa/La asoshisen agi küpdangogo. Nisung karbo atakatem ajak apentsüsa sheürshir Azü jilo asayadaktsütsü tachi tajemtsü teperi ten sen amoktsürtemji Azü anishirtem, saka Azütembo timtem jendi ajurua tasüa asür saka Pa/La majung aser mekümtangba agi lokdi menentsür ta tang kümdaktsür aser timtem tang atemmeta agi yarir odang doktsür Azü jilo asayadaktsüba jagi ochi mapa mesayur. Iba ama mapa dang tiyazü rongsen ta majar yapo alima rongsen nunga khen agi tiyazü aser tashiyim mapa iba ama sen aser rongsenji Tsüngremer Ter shilem mapentsüla. Sen amshiba agi tang yimsüsütsü nungpo nü mapang nung nüpur shinga meyaritsü saka yimden mapa shidak inyakra aji yimsüsür tajung aser yimsüsü mapang sen pentenle election mapang sen agi nüngdakba pur alizükle ta otia inyakra aji nüpuri akinüba asütsü ajia ochi mapa asütsü. Tangateter ishikati ochi inyaknür saka noklang nung tokkurtoki memelonger anungji ochi nung alirtem tayi memenatsü. Election nung yimden aser Tsüngrem anema inyakertem yimsüsürtem aser nüpurtem ajak junger ama temulung lemlemer saka ochi mashiba pur tsüngdongkudonga alir mali nung tansü maker. Yimsüsürtem na Tsüngremi shimba asü nü sasa nokdaker tsüngrem bilemtettangma. Govt office yimya nung sen achitsü lenmang aika lir saka tilatiba kaji TA (Travel allowance) duty aortem nem jilia TA tesadang agüja atar aser kowe nü senzütir aji sürkelen TA billji renemer saka kar atemapo aji tatem kechaser TA bill nungji ochi mashi aika lir. Aji tang masü ano sen achitsü tanga lenmang kowe ali? Iba ama dangji tembartem kümdakjang ta Yisui mashir. Tateshitsü ka, Tang tashi nung arogo sen nung ochi mashi inyakba mangashe, saka Tsüngrem mangatetteripo inyakti asünung deubar kenü tenla sen tesatang aki yonga nüpurtemi aji züngtanga mali aji tang masü tenüng agi khristan purtemi Ter shilem metenlar aika lir Malaki 3:8 Iba ama ochi mashi rongsen jagipo tanem tanemi kibong ajak chirepber.

Alima nung ochi rongsen amshirtem aika lir, Tongtipangsa foreign lima nung ayangertem bei lima nung taa angutsü ki jen asürtem aika lir. Govt mapa nung top officertem karipo bei ita sen agi tenük morepba sünger ochi shia inyakertem mapa nungi anisüngzüker dang kibong mesütsü ajak nük agi ngua taa angutsü ki jen asürtem lir. Ajakipo shishilempapa meinyaker saka meranga ayanga takar akümertem lir. Tsüraportemi meranga inyakba nungi tsük jen tulu talang ana asem doktena yur kika süchirtem yimtsüng shia liasü parnok chirtem ajitet ajitetta suyapokyartem tanüa aika lir. Parnoki khrista dak mamangba agi ashe sü chiba tashi nung temulung lemtetta liasü. Kechaser Sü ka achi dang küm ka songtema anembonger anungji Parnok dangji ochi shirtem ta jaa liasü. Parnoki meranga inyakba nungi anguba Tsük nung kanga timtemba burtem aoun tsük agi tsüktem masü yaria liasü, rongsen ajak agi nüngdakbaburtem yaria mesüra mesüa liasü. Saka tsük agi küm madonger tashe kar nem tsüktem agüja aru. Rongsen ajak tamajung mesüra temenen masü, temenen asübo Tsüngremi tanga lenmang ka renemtsür lila. Rongsen nung ochi shir aser ochi mashirtem lipaliro taküm nung lenmang ka agiposa pendanger. Rongsen shidak amshiba jagi kibong aser taküm rangpen sayur aser Tsüngremi kuli agütsütsü Laishiba jagi asenok ten jembir. Tenem ozü süpunü Oja ozü tepang mere mama apensapo lir saka sen agi makokba ajanga yimsüsür tajung aika ali tur remja lir. Alima raksa mapang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laishiba nung 25 ben tetshia aliba oset ka Israel nung ngutetogo



Osak nung aremba sü noksa nung angur. Kasa noksa nung 'scarlet worm' angur.

July 20, 2024: Tejen Lai nung aiben tetshia aliba nungshi oset ka Israel nung archaeologist temi ngutetogo; küm 3,800 tejaklen aliba 'scarlet worm' agi yangluba osak (dye) ji Israel nung lungki ka nung angu.

Sentsü temeren osakji shiruru tilaka aser iba shiruru indang antzü agi yanglu. Akhidang nisungtemi süoshi nung sentsü temerem aser temeremso adokdaksütsü atema iba shiruruji menügsar amshia liasü.

Judean Desert nung aliba 'Cave of Skulls' nung centimeter 2 shi sü ngutetba osangji Brihostibarnü Israel Antiquities Authority (IAA)-i sangdonga liasü.

Laishiba nung shia aliba shiruru tila 'scarlet worm' ji sülem-süng nungsa alir. Iba shiruru tetsü aser iba shiruru

antzü nungji carminic acid lir. Shiruru den antzü menügsabaji ajanga sentsüh temerem, temeremso aser temerem mesükba sentsü aika adokdaksür.

Nisungtemi iba shiruruji benden aser 'vinegar' inoktsüba sülen shiruruji kongdaksü, iba sülen parnoki shiruru takongji menügsar süoshi nung rong atema amshia liasü.

Akhidang sentsü temerem aser temeremso sentsütemji kanga tongtimbang liasü, ta Journal of Archaeological Science-i metetdaksü.

Scarlet dye (scarlet worm agi yangluba osak) dangji Ibrishi nung shani mesüra tola'at shani ta ajar aser ibaji Tejen Lai nung kija alakteta tetshia lir mesüra tanga osak den külemi aiben tetshia lir.

Laishiba nung sentsü temerem indangji Anitet kaket nung aiben tetshia lir, talisa Anitet 26:1 nung shia lir. Iba Lai tekongji yamai lir, "Ano, nai tekülemdak sükiji teyindangba sü ter dena yangluang, temechiba kümpa sü tanük, anüng sentsü, nakrema meremba aser jakja-a meremba sentsü, cherubim keter teangshi mapa inyaker mapa ama nai yangluang."

Research agirtemi osakji high-performance liquid chromatography (HPLC) amshia tendanga liasü. Parnoki iba tetendangbaji ajanga iba shiruru nungi adokdaksüba kermesic acid aliba puteta liasü. Iba süji Middle Bronze Age (1767-1954 BC) mapang nung yangluba liasü, ta parnoki bushitetogo.

ANO GO ABEN TSÜNGREM DEN

SHINGA ANEMA TIYAZÜ KULI TEYI

Aser samesa nisung ana pa anasa amen, aser Nabot anema nisungtemi angashia noktaka kuli ashi, "Naboti hangrem aser chuba atakatemer." Idangji parnoki pa yimti nungi atsür adoka pa dak lung agi ona pa onseta sūdaksü. 1 Chubatem 21:13

India ya alima nung democracy tulutiba amshiba country lir. Indian constitution, Article 25 Freedom of Religion aser freedom of speech and expression article 19 lir, aser iba ama kati-ka akhüm tsübutepa tamangba yimsü ajak pei-i amangnüba sadoksadoka amangtsü aser alitsü nükjitong lir. Saka tanü minorities ta jembir aser shitakba agia hindu nungertemi teyazü kuli kanga amshia item minorities ambangyim aser tashiyim agi amshir. India lima tesem aika nung khristantemi kuli asübaji, tamangertem, missionarytem, evangelisttem, pastortem aika reshikangshir aser tepseter, jailia yoker aser Tenla ki aika raksatsür. Iba ya hindu nungertemi tiyazü kuli yanglua rishikangshir aser tepseter. Tang rongtak jembiba Uniform Civil Code indang nung asenok ajak sepangtsü meranger.

Naboter tzükmenatzü lu nükmerem aser tiyazü kuli bushia yanglur pa tepseta par alu chubai agiba ama alimai metetsümonga khristantem tamang raksatsütsü meranger. Iba ama asenok tamangertema aika tashioktsüba shisatsü bener noktaka lir. Tenüngsangken züluri T. Ken. 62:4 nung zülua lir; "Ashioktsütsübaji parnok nükjidong mashileni anitsübaji parnok tejangraba lir. Parnoki tebang agi moatsür, saka telung nung atakatemer." asen tamang küm kümshidi. Amen.

Communist linük 4 nung tepuokdak Khristan 52 lir; 20 samaogo

July 20, 2024: Tang alima nung Communist linük 5 nungi linük pezü nung Khristan 72 shi puoka liasü, parnok 52 tepuokdak lir aser 20 samaogo, ta International Christian Concern (ICC)-i metetdaksü.

Iba osang ya ajanga Communist sorkar aliba linüktem nung Khristantem reshikangshiba tia sayur, ta ICC-isa metetdaksü.

United States Commission on International Religious Freedom (USCIRF) indang report ka nung ajemdaker ICC-i, tang communist linük pezü-China, Cuba, North Korea aser Vietnam nung Khristan 52 shi tepuodak lir aser tepuokdak lir 20 samaogo, ta metetdaksü.

ICC staff kati, ajisüaka item linüktem nung tepuokdak alir Khristantemji iba dang nungjagi kanga teimba alitsüa akok, ta metetdaksü.

Paisa, "Akhidang ama

tanu putu nunga Khristantem atema Communism nung ya lendong keta lir aser teraksatsüba lir," ta metetdaksü.

Communist linüktem nung ketdangsertemi, Khristantemi linük security anema inyaker, linük telongjem raksatsür mesüra sorkar anema nokdaker, ta tai tonglokja Khristantem apur, ta ICC-i metetdaksü.

2021 küm China nung Khristan, Yang Jianxin apuba sülen pai ozüng alema business inyaker aser ozüng alema Laishiba menünger ta pa nem tai tonglokja küm 5 ser ita 6 tepuokdak ayutsü obendang agüja liasü.

Ano 2001 küm North Korea nung Khristan, Chung Yong Cheol-i China nung Laishiba azünger ta tai tonglokja apuba sülen North Korea-i meyipa yok. Pa küm 10 political prison camp nung puokdaksü obendang agütsü.

Tangbo pa kong aliar mejangja.

2018 küm Vietnam nunga Khristan, Y Min Ksor-i Vietnam nung yimsü temeden dak sendakba osang tai proker, Vietnam nung meimchir temeden balala anema inyaker ta osang tai proker aser linük temeja ka tentettsü atema pai tangar ajungshir, ta pa nem tai tonglokja apu.

Vietnam ketdangsertemi pa reshikangshiba sülenjoko Arogo nung shilem magitsü atema pa nem kangshia nangzükdakja liasü. Pai linük telongjem raksatsütsüa inyak, ta aija pa küm 14 tepuokdak ayutsü obendang agütsü.

Vietnam linük nung aliba jail nung puoka alir Khristan 11 samaogo. Khristan 11 ji Protestant trok aser Catholic pongu lir. Parnok ajakji 2011 küm nungi tenzüka 2016 küm tashi nung mapang balala nung jail nung puokba liasü. Ajisüaka tangbo parnok 11 ji kong

aliar memetet samaogo.

Khristan 11 ji tangbo jail nung mali anungji süadoker asütsüa akok ta bilemer.

2018 küm Vietnam sorkari Law on Belief & Religion ta ser ozüng tasen ka benoka liasü. Iba linük nung Khristan telok balala aser tanga yimsütem bentshitsu melar saka sorkar ketdangsertemi parnok inyaksangshi ajak mita repranger aser azüoker.

Kasa ozüng kübok yimsü dak sendakba reju aser telok balalai registration tama agitsüla.

Vietnam nung Arogo aika kangshia anendaktsüogo aser pastor kar dangbo Arogo nung züngsemtem ajak tenüng meshia liasü.

2021 küm Cuba nung Pastor, Lorenzo Rosales Fajardo dak kanga mejungi azük aser pa dak natzü nalokja liasü. Cuba sorkar anema longkak aitba nung pastor-i shilem agi, ta pa

nem tai tonglokja liasü.

Pastor Rosales Fajardo-i sorkar mezüngmeshi, lokti nung mepetmesü adokdaksü aser pai tangar ajungmeso ta pa aitsüba sülen küm 7 tepuokdak ayutsü obendang agüja liasü.

China, Cuba, North Korea aser Vietnam linüktem dak alia communist linük- Laos nunga ketdangsertemi Khristantem reshikangshir.

U.S. Department of State report 2023 ajanga ashiba agi, Laos nung Khristan yimsü toktsütsü memelungertembo ketdangsertemi bendanga züngshir aser sendoker.

Yaküm October ita nung Laos kübok Sa Mouay District nung ketdangsertemi yim asem nungi Khrista kibong 8 meindok aser ki raksaja liasü. Tamalen-a ketdangsertemi yimsüng aika nungi Khristantem meindoka liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Takralulemtsü

(adv) sü atakdang amshiba osettem (weaving loom implements)

* Tanü asüngbo sü matakba agi takralulemtsü ajak samadagi.

Takang

(adj) tekümküm, temerang (hard, firm)

* Süng takang agi ki yanglur.

OLONG PAITEP # 6851

	1			2		3	4
5						6	
7		8					
						9	
	10						
11							12
				13			
				14			
15							

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüing ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6850 TELANGZÜBA

TIPIEN :

- 1. Tzüshi, 2. Saru, 4. Renlok,
- 7. Amos, 9. Zübi, 10. Teki, 11. Kija,
- 14. Anitet, 15. Süng, 16. Tepunü.

LANGTSÜNGLEN :

- 1. Taremzüc, 2. Sasa, 3. Rogo,
- 5. Labi, 6. Kichiba, 8. Shisatsü,
- 10. Teni, 12. Itsü, 13. Aong.

NAI-A YA METETTER MA



Alima nung kou talangtibaji arishi küm 46 tain Smita Srivastava lir. La ya Uttar Pradesh nungi aser tang Guinness World Record bena lir. Srivastava-i la dang "real Rapunzel" ta ajar aser la arishi küm 14 asü dang nungi kou khen dang memejebi awa. Tang la indang kou tasazükji feet 7 aser inch 9 talang lir. Smita Srivastava-i hopta nung anaben tashi kou shitoker aser khen shitokdang minute 45 shi agir. Iba sülen ghonda ana shi hair dryers amshia kou kongdaksür.

Indian Army-i Captain Jintu Gogoi'er tsüraburtem tushi



Guwahati, July 20, 2024

(Agencies): India nung July 26 nü 'Kargil Vijay Diwas' indang silver jubilee amongtsü lia Indian Army-i Hokolbarnü Kargil war hero Captain Jintu Gogoi'er tsüraburtem den ajurutepa tetushi agütsüogo.

Iba tenüngsang sentong ajanga nisungtem temulung raksa kechiyong asür Captain Gogoi tasütait mapa bilemteta tetushi agütsü ta Assam defence PRO, Lt Col Amit Shukla-i ashi.

Captain Gogoi indang

senmang kodanga mamadoktsü. Indian Army-i linük tenzücba wadang nung taküm bendanga agütsüba hero tem teti tushitsü ta pai ashi.

Captain Jintu Gogoi ya Duluprabha Gogoi aser Thogiram Gogoi na jabaso liasü.

June 29, 1999, Captain Gogoi-i Garhwal Rifles nung 17th battalion anir Line of Control (LoC) anasa Kala Pathar nung tsükchirtem meindok.

Tsükchirtemi injang kanga khalokjaka Captain Gogoi-i

kanga dang tasü itta aser lenisüba tajung sayua tejakleni rarayonga ao. Idangji tsükchirtemi pa meketbang saka pai parnok ket nung bendanga agütsütsü memulungi raradang tsükchir ana khaset aser pa taküm bendanga agütsü. Pai iba mapa inyakbaji operation takok anguba nung tongti shilem ka liasü ta Assam defence PRO-i ashi.

Captain Gogoi nem Vir Chakra agütsüogo aser pai Assam aser linük nung lanurtem maneni ajungmesor.

Manipur nung nisung 65 apu; prangpong-injang aika angu

Imphal, July 20, 2024

(Agencies): Manipur nung security forces aser police-i tesem balala nung checkpoints 102 lapoka mita aodang temulung melemi bilemer nisung 65 puogo aser prangpong-injang aika ngutetogo.

Imphal East District kübok Thamnapokpi Uyok Ching nung mita aodang Long range Mortars/Rail Guns, Burmese Iron rod IED, Burmese IEDs, Modified Lathode Grenade Launcher/Gun, HK G3 Rifle, Japanese .303 Rifle, .303 Rifle, .22 Pistol, HE-36 Grenade, Local IED, 115 live ammunition rounds, Chinese Radio Set,

Lathod Grenade empty case aser Pompei bomb empty shell tem ngutet.

Sepai aser police-i apuba nisungtem chiokogo aser telungpur jenokdak ana nung anguba prangpong-injang ajak Manipur police ket nung agütsüogo.

Tetsüing anaprong nung injang khaloktsü

Hokolbar aonung Lilong Nganglong Manung nung arishi küm 36 tain tebur ka dak tetsüing anaprong nung injang khaloktsü.

Iba nisung ya Md Abdul Salam ta jangjaogo aser pa ya Golapati nung alir. Yasüing 9:00 ako meta prangpong abenertemi

pa dak injang khaloktsü.

Mejangjatetba nisung kari Md Salam ya par kidang nungi anizüka anir ao aser tetsüing anaprong nung injang khaloktsü.

Md Salam ya tesüiba nung ozüing alema drug shishilembaba ken o tem nung tai tonglokka lir. Telungpur telok ka nungi züingsem kari pa anir ao aser drug shishilembaba meinyaktsü shir chiok ta osang angazüker.

Pa Lilong nung aliba Noor Hospital-i anir aoa anepaludar. Police-i iba tatalokba atema FIR ka benokogo aser tang tashi nung nisung mesüra telok shingiaia tenüing agiba memetetdaksü lir.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : : KOHIMA**

NO.ED/SCH/RIMC/EE/2024-25

Dated 17th July 2024.

ADVERTISEMENT

Advertisement for admission of boys and girls to Class VIII in Rashtriya Indian Military College (RIMC), Dehradun for July 2025 term to be conducted on 01st Dec 2024 (Sunday).

- Boys and Girls are both eligible to apply for admission to the RIMC, Dehradun. The candidates should be in the age bracket of 11½ to 13 years as on 01 July 2025, i.e., they should not be born earlier than 02 July 2012 and not later than 01 January 2014.
- Candidates should either be studying in Class VII or should have passed Class VII from any recognised school at the time of admission to the RIMC i.e. 1st July 2025.
- The written part of the examination will consist of three papers namely Mathematics, General Knowledge and English. The Mathematics, General Knowledge and English papers will be conducted between 0930-1100hrs, 1200-1300hrs and 1430-1630hrs respectively on 1st December 2024 (Sunday). The date for the interview will be intimated at a later date only for those candidates who secure 50% marks in all the papers in the written exam.
- Prospectus cum Application Form and booklet of old question papers can be obtained by making online payment on RIMC website www.rimc.gov.in or speed post by forwarding self addressed slip and an account payee bank demand draft of Rs 600/- for General Candidates and Rs 555/- for SC/ST Candidates. The Demand Draft will be made in favour of "THE COMMANDANT, RIMC FUND", DRAWEE BRANCH, HDFC BANK, BALLUPUR CHOWK, DEHRADUN, BANK CODE -1399, UTTARAKHAND.
- Application on prescribed form accompanied by 2 passport size photographs, Domicile Certificate, Photocopy of Aadhar Card (both sides), Birth Certificate issued by Municipal Corporation, ST/SC Certificate and original Certificate from the Principal of the current school with photograph attested stating the date of birth and class in which the candidate is studying should be submitted to the Directorate of School Education by 30th Sept 2024.

(THAVASEELAN K) IAS
Principal Director.

China nung apu ka chirepba sülen nisung 11 asü



Beijing, Chiteni/July 20 (Agencies): Tzünglu kanga aruba aser tzümetzung agi kongshir aliba mapang China anütoktiplen Shaanxi province nung highway apu shilem ka chirepba sülen nisung 11 asü aser nisung 30 dak tema samara bushidar, ta ketdangsürtemi metetdaksü.

Iba lendong ya Hokolbarnü 8:40 ako nung Shangluo yimti nung ataloka liasü. Asürtem ajak ya gari pongu nungi nguteta liasü. Ajungbena tzünglu kanga sashia aruba aser tzümetzung aruba sülen garitem ya apu nungi tsüka liasü, ta state news agency Xinhua-i Honibarnü sangdong ka ajanga metetdaksü.

State broadcaster CCTV-i ashiba agi, highway apu chirepba ayong nung tsükba

sülen gari 20 shi aser nisung 30 dak tema tang tashi monguteti lir. State media sangdong balala ajanga ashiba agi, Honibarnü maneni teküzmükba maparen balala inyakdar.

Tenük kuli agütsür kati local media dang ashiba agi, pa apu tonga aoba mapang tanga gari anirtemi pa dang gari anentsü ayima shia liasü.

"Kü jakdang aliba truck ka maneni ao aser tzü nung tsük," ta tenük kuli agütsüsang yagi ashi.

China tir Xi Jinping-i, nübürtem taküm aser property kümzüksü atema teyari aser teküzmükba maparen takok tashi inyaktsü tetuyuba agütsüogo.

Mongolbarnü nungi China anütoktip aser teyongsü nung tzünglu kanga arua tzümetzung

adokdaksüba ajanga tesem aika kongshir lir aser Shaanxi kübok Baoji yimti nung tzümetzung aser anentsüh lendong nung Hokolbarnü nisung pongu süogo aser nisung ti samara bushidar.

Henan kübok Nanyang yimti nung tzünglu küm ka shilem hopta tetenzük dang arua liasü, ta state media-i ashi. Sichuan province nunga nisung ana süogo aser nsung tenet samara bushidar.

China nung tsüngsang mopung kanga majungba ajanga tesem balala kanga mejungi kongshiogo, kong mopung tatsük aonba ajanga nübürtem kanga timtemtepba densema lir.

May 18 nü Meizhou yimti nung highway shilem tulu ka chirepba sülen nisung 48 tashi taküm sama liasü.

PELABA LEMSATEPER



(07-06-1931 – 15-07-2024)

Asür Mr. K. Wati Sanglir, Luyong - Molungyimsen, kinungertem ajanga kija, aser lokti telen balala-i nübu, rongsen aser mapang agi yariba asoshi nenok ajak dang pelaba lemsateper. Tsüngremi nenok maneni moajangma ta ozü sarasadem.

- Kinungertem.

Bangladesh nung curfew benokogo

Dhaka, Chiteni/July 20 (Agencies): Sorkar mapa mekazüka toktsüba ken o dak sendakba nung linük ajunga nung anogo iaka nübürtemi longkak aitba sülen Bangladesh nung curfew benokogo aser military force yokogo.

"Sorkari curfew benoka civilian authorities nem teyari agütsüsü atema military yoktsü telemtetba agiogo," ta Ato Kilonser Sheikh Hasina indang press secretary Nayeemul Islam Khan-i news agency AFP dang ashiba den curfew ya osang sangdongba mapang nungi benoktsü ta shisem.

Linük yimtiba Dhaka nung police-i, mepetmesü adokba nungi jenboa alitsü atema nübürtem adenshia sentong kecha magitsü tenokdangba agüja liasü.

Ajisüaka iba ajanga nübürtem menokdangtet aser tenokdangba agütsür liaka police aser longkak aiterem tsüngda mangatettep adoka liasü. Rally balala ayongzüka agiba nokdangtsü atema internet shibangtsüaka nübürtemi maneni longkak aitogo.

Al Jazeera osangbener Tanvir Chowdhury-i Dhaka nungi ashiba agi, curfew koba Hokolbar aonung ayaterem nungi benokogo, iba ajanga nübürtem tali mangmangtepdaaksütsü aser linük tali mesüngjemba kümdaaksütsü.

"Tenokdangba agütsür aliba ajanga nübürtem taoba anogo ana tashi kimai metuguteter. Tang curfew benokogo aser Brehostibarnü nikongtsütsü nungi internet ajunga shibangtsüogo," ta pai ashi.

Chowdhury-i ashiba agi, sorkari kaketshirtem aser nübürtem yimtung nung inyakshia mesüdaaksütsü

atema curfew benokogo, kechiyong parnoki longkak aiterem maziükteti kümдар.

Paisa, longkak aiterem hai haura akatsü atema tebilemba kecha mali ama reprangteter aser kasa mapang nung paramilitary forces aser police amshiaka sorkari yimtung nung nübürtem maziükteti kümдар, ta ashi.

High Court-i June 5 nü 1971 küm Pakistan nungi nüjiso atema raraba nung shilem agir chirnurtem nem sorkar mapa shilem 30 mekazüka toktsütsü atema tanaben benokshiba sangdongba sülen kaketshirtemi longkak ait tenzüka liasü.

Hombarnü Ato Kilonser Sheikh Hasina-i aniba Awami League party indang student wing, Bangladesh Chhatra League activists temi longkak aita aliba kaketshirtem amak tenzüka sülen mepetmesü tenzüka liasü.

Brehostibarnü Dhaka nung kaketshir meyirejang aika police den mangatettep adoka liasü. Iba lendong nung bus anir ka aser kaketshir ka densema nisung 11 asü, ta police source kati Al Jazeera dang ashi.

Maneni Hokolbarnü longkak aitogo, ajisüaka nisung taküm samaba indang osangbo kecha mali. Ajisüaka Bangladesh indang Independent Television channel-i Hokolbarnü nisung 17 asüba sangdong aser Somoy TV-i nisung 30 asüba sangdonga liasü.

Sorkari public aser private university tem ajak shibangtsüogo aser campus temi security force tem yokogo. Sorkarisa kaketshir lenirtem den ajuruteptsü mulunga lir ta shiogo.

Longkak aiterem sensaksem ka-a tangatettep ka dangi maru tsüngda nisung tepsetba atema khuret sorkar nem bendaktsüner.

Look for +F Logo

FORTIFIED FOOD STAPLES INDANG TAJANGZÜK

VITAMIN B12
Nervous system inyakshia azüoka ayutsü atema kanga tongtibang aser azü renlokba nung teyari agütsür
FOLIC ACID
Foetal terenlok aser azü renlokba
IRON
Anemia den rarar

VITAMIN A
Night Blindness nungi jenboa alitsü atema teyari agütsür
VITAMIN D
Teret tashi ita kümdaaksür

IRON
Anemia den rarar
IODINE
Normal growth, thyroid aser tekelok inyakshim nung teyari agütsür

Double Fortified Salt

Food Fortification nung micronutrients togtibang tera chiyongtsü nung inokba densema lir

Iba ajanga diet tajungba kümdaaksür aser anogoshi nungdakba nutrition 30-50% angutsü teyari agütsür

Item fortified products tem ya packet tem nung +F logo aliba ajanga jangjatsü

Chiyongtsü taste, texture mesüra flavour nung kecha temelenshi mali

State Food Safety Authority,
Department of Health and Family Welfare, Govt. of Nagaland.

